

# Muchu Mas ku Sèn

Kualke hende hòmbèr por bira tata. Bo por bira tata sin diploma, sin talento, sin esfuerso. Responsabilidad di tata? Ai n' tin nada den e kos ei, algun hende ta pensa.

Pa bira tata ta un kos. Ma pa ser un **bon** tata ta algu totalmente diferente. Esei no ta un tarea fásil. Mas hòmbèr ta frakasá komo tata ku na kualke otro okupashon.

Kiko ta responsabilidad di un tata?

Mes ora nos ta pensa, un bon tata ta PROVEÉ pa su famia. Nos tur sa ku un tata tin e deber finansiero pa e kriaturanan ku el a pone riba mundu, maske algun tata tòg ta neglighá esaki... Ma hopi tata ke sa ku nan responsabilidad pa ku nan yunan ta kaba ora nan ta duna e mama un parti di loke nan a kobra. E tata tin ku komprendé ku **kos material no ta e úniko nesidadnan ku e mester proveé**. Pa ta un bon tata ta enserá muchu mas ku sèn...

Ta importante pa proveé amor pa bo yunan. Kumprando kos pa bo yunan no por remplasá bo ekspreshon personal di amor. Brasa bo yu, bis'é ku e ta stim'é.

E manera ku muchanan ta skirbi amor ta T-E-M-P-U. Hopi tata ta asina okupá ku nan propio interes ku nan no tin tempu pa nan yunan. Tata, duna bo yu bo tempu. Laga e yu mira ku bo tin interes p'é i loke e ta hasi. Ora bo ta grita p'é for di tribuna na su wega di little league e ta sintié bon. Ora bo ta keda sin sali ku bo amigunan pa bo por ta presente pa tend'é bisa un poesia dilanti hende ta lag'é sa ku e ta importante pa bo.

Hopi mayor ta kla pa hala atenshon di nan yunan ora nan ta hasi malu. Ma e yu ke pa bo enkurash'é ora e ta hasi bon. Tata, no lubidá pa proveé enkurashamentu pa bo yu. No skual so e pa e 4 òf 5 riba su rapòrt anto ignorá e 7 i 8.

Un bon tata tambe ta proveé e instruksjon. Siña bo yu loke ta bon i loke ta malu. I sòru ku bo ta duna un ehèmpel positivo di loke bo ta siñ'é. Tantu bal pa bo bis'é pa e no gaña si bo mes ta saka mintira. E yu lo hasi loke bo ta **hasi**, no loke bo ta bisa.

Un di dos responsabilidad di un tata ta pa PROTEHÁ su famia. Ningun bon tata por para wak pasivo mientras un malechor ta menasá su yunan. Un tata tin e tendensia natural pa bringa pa defendé su famia di peliger fisiko.

Ma no ta peligernan fisiko so ku ta menasá bo famia. Tata, bo ta protehá bo yunan di mal amigu? Bo sa ku ken bo yu ta anda, ki tipo di person e ta? Amigunan por hinka bo yu den un mal kamina, i e por sufri e konsekuensianan di e amistad hopi aña. Hopi biaha e yu no ta basta maduro pa mira e peliger. E tin mester di bo guia. Beibel ta bisa, *“Esun ku anda ku hende sabí lo ta sabí, ma un kompañero di hende bobo lo sufri daño”* (Proverbionan 14:20). Protehá bo yu di bobonan moral!

Protehá bo yunan di siñansa destruktivo. Hopi filosofia falsu ta deseoso pa haña bo yu den nan gara. Bo ta protehá bo yu di filosofianan mentiroso ku nan ta lesa den revista òf buki, skucha na radio, skol òf den músika, mira na televishon?

Hopi tata ta laga edukashon spiritual pa e mama. Ma segun Beibel, e tata ta e lider spiritual—e pastor—di su famia. Tata, protehá bo famia di sektanan i siñansa religioso falsu. Pa bo por hasi esei bo mes mester konosé Beibel bon. Bo mester lesa Skritura i studi'é. Palabra di Dios ta algu pa *“Siña ku tur diligensia na bo yunan...”* (Deuteronomio 6:7). I no manda bo yunan bai iglesia; sea un ehempel i **bai huntu ku nan**.

En realidat, e protekshon spiritual ta esun mas importante. Bo por protehá bo yu di un destino horibel eterno na fièrnu si bo siñ'é fo'i Palabra di Dios ku e ta un pekadòr pèrdí ku tin mester di Hesus pa reskat'é.

Kiko ta responsabilidad di un tata? E diferensia entre kualke tata i un bon tata ta ku e tata eksitoso ta tuma su responsabilidad komo tata na serio. I esei ta enserá muchu mas ku sèn!